

La situaziun resta fragila

La limita da 1000 persunas croda l'october

DA MARTIN CABALZAR/FMR

■ **Il Cussegl federal ha prolungà il scumond per manifestaziuns grondas per in mais, tochen la fin da settember. Ils arranschaments cun dapli che 1000 èn però lubids a partir dal cumenzament d'october, dentant sut cundiziuns fitg severas.** A partir da l'october èn manifestaziuns grondas cun passa 1'000 persunas puspè lubidas en Svizra. Quai ha il Cussegl federal decidì ier. Per questas occurrenzas cun blier publicum valan dentant cundiziuns severas ed ellas basegnan ina lubientscha dals chantuns. Las proximas duas emnas vul la Confederaziun elavurar ensem cun ils chantuns ils criteris per talas manifestaziuns.

En cumpetenzas dals chantuns

Per lubir in'occurrenza gronda ston ils chantuns resguardar la situaziun epidemiologica sco er lur capacitads realisar in contact tracing. Uschia vul il Cussegl federal – sco el ha infurmà ier – segirar che la situaziun da corona na daventia betg mendra en Svizra. Cun questa avertura precauta vul el dentant er resguardar ils basegns da la societad ed ils interess economics dals clubs da sport e da las organisaziuns culturalas. La maioritad dals chantuns percenter avess preferì ina schlucada pir per la fin da quest onn. Els han argumentà lur resalvas cunzunt cun la situaziun epidemiologica che è anc adina instabila.

La conferenza dals directurs chantunals da sanadad insistan sin ina applicaziun unificgada per manifestaziuns grondas per l'entira Svizra. Las organisaziuns da sport e cultura pertutgadas eran s'engaschadas fitg per schlucar las restricziuns uschè sveltes ed uschè ferm sco pussaivel. Ils organisaturs d'arranschaments sportivs e culturals sajan uss con-



Las novas mesiras e prescripziuns dal Cussegl federal: occurrenzas grondas èn lubidas a partir d'october.

FOTO RE:PUBLICA/CC BY-SA 2.0

responsabels d'evitar ulteriuras restricziuns. «Dad els dependi uss, sche l'avertura per reuniuns pli vastas sa cumprova», vegn cità il parsura dals directurs chantunals da sanadad Lukas Engelberger.

Resguardond ils giavischs dals chantuns per ina pratica da lubientscha unitaria ha il Cussegl federal incaricà il departament federal da l'intern d'elavurar ensem cun ils chantuns enfin ils 2 da settember las premissas necessarias per facilitar ina procedura da lubientschas coordinada. Quellas duain resguardar tant manifestaziuns sportivas sco reuni-

uns culturalas e religiusas. I na dat pia naginas reglas specificas per scadina branscha, sco quai ch'era vegnì speculà. Pertutgant las reglas da distanza ed igiena possian chantuns e Confederaziun sa basar sin las recumandaziuns da l'organisaziun per la sanadad mundiala WTO, ha Alain Berset precisà sin dumonda dals schurnalists.

Confederaziun dovra ulteriurs daners

E la finala dovra il Cussegl federal era dapli daners per surventscher la crisa da corona. El propona perquai al Parla-

ment 13 ulteriurs credits posteriurs en la summa da radund 770 milliuns. Sin fundament da la situaziun extraordinaria vegnian plinavant ulteriurs quatter credits ad esser necessaris, ha il Cussegl federal intunà. Igl haja numnadamain sa mussà chi dovria tar las mesiras en singulas spartas anc ulteriuras mesiras. Enfin qua ha la Confederaziun gia concedì expensas da 31 milliardas, ed impègn e garantias per 42 milliardas.

700 milliuns per il traffic public

Durant il temp da «Lockdown» èn las frequenzas dal traffic public sa diminui-

das per fin 80 pertschient. Quai ha naturalmain già consequenzas gravantas sin las entradas. Il Cussegl federal propona perquai en ina missiva al parlament mesiras da sustegn en la dimensiun da radund 700 milliuns. Il Cussegl federal na vegnia dentant betg a sa participar als deficits dal traffic local, sco quai che la presidenta federala Simonetta Sommaruga aveva pretendì oriundamain. Quai saja chausa dals chantuns e da las vischnancas.

La gronda part dals credits posteriurs, numnadamain radund 476 milliuns, vegnan impundids per covrir las expensas supplementaras en connex cun corona. Radund 288 milliuns vegnan impundids per la finaziun dals tests da corona, per uschia pudair reagir sveltes ed impedir ch'il dumber d'infectads creschia puspè.

14.2 milliardas per la dischoccupaziun

Tenor il minister d'economia Guy Parmelin vegn la procedura simpla per la vura curta prolungada da la fin d'avust fin la fin da december. Plinavant duain las proceduras birocraticas vegnir simplifigadas. Il Cussegl federal propona al parlament da sustegnair la segirada da dischoccupads cun 14,2 milliardas. La reserva d'etanol duai vegnir augmentada per 6 000 tonnas, quai che vegn a custar 5,82 milliuns. Cun questa reserva pon ins producir dischinfectants, sche quai è necessari.

Restar vinavant precaut

La presidenta da la Confederaziun Simonetta Sommaruga ha appellà da restar vinavant precaut ed attent: «Pli ferm ch'il Cussegl federal schlucà las mesiras e pli gronda che la responsablad da mintga singul daventa», ha ella puntà al cumenzament da la conferenza da medias.